

四庫全書

子部

欽定四庫全書

子部

星學大成卷六

詳校官監察御史<sub>臣</sub>邱庭澍

靈臺郎<sub>臣</sub>倪廷梅覆勘

總校官進士<sub>臣</sub>朱鈐

校對官中書<sub>臣</sub>潘庭筠

謄錄監生<sub>臣</sub>王宮

欽定四庫全書

星學大成卷六

明 萬民英 撰

安命論

皇家源流以太陽為命之所自出太陽出卯故人之立  
命亦在卯不知太陽出卯者舉大較也以大較例人安  
命此命之所以不準今以太陽東升考之小寒至芒種  
小暑至大雪俱出卯若冬至後十九日晝極短而出辰

初初刻夏至後十五日晝極長而出寅正四刻人立命  
既以太陽為體則所生所出時候亦當隨太陽推遷以  
余觀之凡日出卯時則立命在卯若出寅辰則立命當  
在寅辰通闕加盤俱因輪轉方足以體造化之妙臺厯  
首論十二宮立命專考對度余命太陽在斗十九對度  
是張一當以張一度立命是也況太陽過宮處毫釐之  
差宮分判然又不可不細考也

十二位論

三辰論十二位高下歌

當生日看何宮 加何元時回視東  
天輪自轉地輪定 卯上長為命所宗  
然後配以十二位 其中昭然賤與貴  
巳卯午上為最強 子酉之方是其次  
寅申亦以近名之 三合要看亥與未  
此為照處餘則非 吉星要聚凶星離  
辰戌二方稱惡弱 天象奚堪下臨著

善曜何常能致祥 凶星好事渾銷鑠

第三之宮號閑極 五星不得纖毫力

惟有月在此方生 却向命中添福德

十二宮高下乃逆數也凡吉凶星曜在命三合及對見之則力緊也丑之為位乃在癸水之末且其為土又是虛處水遇虛則明故宜於月雖曰閑極實可為用比其他星曜所不能及大抵以卯為命則當從此推之在餘位者固不可執為例也

論命宮主星歌

本位無星理對宮 縱橫三合理皆同

若無一宿推宮主 宮主星同斷吉凶

如人命宮無星者但看宮主星在何方若在七強宮  
更在廟旺亦主富貴若在五弱宮并留逆段或作忌  
星主貧賤或更與惡星  
犯身命不得其死矣

### 論身宮主星歌

古人常重在陰陽 此法推來第一強

日向東生為命局 月從西出作身方

今人只算在身宮 但把當年月位終

理謬不知真造化 枉將心力妄推窮

造化身宮源流皆有自來今之論星皆以太陰坐處  
即為身局是為淺陋夫身宮者與命宮同即以生時  
從太陽數至卯則為命宮胡不以太陰數至酉為身  
宮既以太陰生處即為身宮則當以太陽生處為命  
局此法甚長余世家之學每每賴此

論身命宮歌

身命第一號高強 惡曜偏防犯此宮

日忌火兮夜忌土 不宜十五度中逢

前後最嫌逢惡曜 吉星釣月有光耀

更加金木作宮神 宮主尊時第一妙



天之稟賦實根原身命二宮人之操持亦憑賴陰陽二宿身命二宮防惡曜之侵陰陽二主忌凶星之入擇其尤者則日生重太陽夜生重太陰推其至者則男人重身女人重命然十五度中而遇忌星加宮主星無氣必然禍起災生此論甚審

### 論身命二主

十二宮中惟身命二主最為利害論五星先當輕重乎此夫主星如魚之水土之根魚無水則死木無根則枯身命無主則危此理甚明論主星者畏刑煞忌陷弱如或逢煞與刑逢陷與弱欲長年享福將何所持必然刑

害夭折凡論主星一喜逢祿二喜逢貴三喜逢生四喜逢廟旺五喜高強與善星並立遇此者必功名富貴若陷入遷移必主流蕩在疾厄主傷殘臨財帛多積聚入田宅則田宅萬頃居福祿則福祿有餘入奴僕則奴僕不走與善星併則先艱難而後富貴若逢惡曜斷然貧薄隨驗隨應余嘗試之而屢中也

論星曜同照命宮

金木水同宮若臨廟旺樂度主文章秀麗聰明智慧清

職品序貴格

金土炁日月同宮若廟旺得地主蔭潤福祿龐厚性寬  
處世溫煖也

金火水字日同宮若陷沒主尅父尅妻平生多蹇

金火羅同宮得地則貴乃武職品序若陷沒反成蹇破  
招刑

火土計字同宮若陷沒主凶暴夭刑若非兵權武卒必  
難保平生之福

金木火計孛同宮則曰疊刑主人成中反破福中反禍  
尅害陷禍多蹇招刑

日月羅計同宮則曰蝕神主人損尅父母若在第四宮  
必主破相無主權性暴出身低微偏生庶出

土孛計同宮若夜生更陷沒必主夭壽卑微下愚狠毒  
主刑

火土同宮不問日夜若陷沒宮決多蹇破

孛計金水同宮主性姦雄淫慾酒色招刑是非愛憎臨

身雖身不足舉此十例其他尅剝皆准此

論星曜合照命宮

木金水合照主聰明文藝性多巧伶俐貴氣文秀

日月炁合照福祿厚重享福豐足

火土合照主性靈不藏事得地則聰明陷沒則凶暴

羅計火土合照主形性膽氣凶暴雄豪若為武職主威

權

日月合照主大富貴為人材貌英偉聰明近貴且舉此

五例若有一星臨之須詳前段星辰論其禍福隨宮分緊慢而言之也

凡論五星全在於命宮分野宮度然後論其身宮主星祿主星三方三限主星其星辰禍福子細消詳廟旺陷弱而言之也

歌曰土日同方生在晝 更在陽宮當富有

夜人倘見落陰鄉 作事多艱是殃咎

土星合照福堅牢 好潔難婚亦貴豪

金如會火守強位 性緊貪華性更高

水與土合有學祿 智慧無窮愛番覆

木火同照主貴權 設施驚衆誇神速

木金宜得女財多 貴貌端嚴心多慾

此二星在命宮或對合見之主得富貴貴而多妬

日在火兮生在夜 若據火西必權霸

木星更照定封侯 尤於武庫增聲價

從來日與木同塗 貴顯成家與衆殊

夜生月若火相會 縱然殘滅亦分符

更向高强逢著木 名達財豐真貴族  
火如照月當晝盈 却苦瘡痍每煎蹙  
論星曜對照命宮歌

更推星曜相衝望 就中火土為災障  
對在强方并見月 中年困苦多消歇  
濕宮水照當憂溺 乾位却須防獸噬  
少男少女少資財 多病多迷多口舌  
或遭毒藥及刑傷 了了經中皆具說



東南巳午為乾宮西北亥子為濕宮

諸方最怕陽對木 復在陰宮更勞漉

金如望火不利婚 若使迎陰却宜娶

土星衝月蹇語言 作事多妖難與語

月如見土天并狂 見水其音為吃苦

火日自傷先尅父 土月須知不宜母

火星對月轉就火 須信望中俱作禍

火月或土對土月或火對及月對土火是也

不然共守上下宮 或伴月行西沒過

此為夭折寒微人 縱使暫成終亦破

流年星與限值及太歲相宜則有如意之事然根基  
淺薄終久不利也

按此節專論日月怕見火上亦須分晝夜而言之

### 論財帛宮

若見金木日月主豐足溫厚富福經云足祿多財木星  
與太陽同會平生不耕蠶而衣食具所謂生居豪族世

無虞出有輕車食有魚福壽厚高天與佑平生萬事稱  
心如○金主得妻財○月常有財帛多成敗不積貯○  
日多積蓄星聚為福忌土火孛計水臨照此宮或臨巳  
午之上更有火土之照決多蹇剥土主耗散縱得錢纔滿  
必傾若吉星合照同宮不妨四十後五十微發經云火  
居財上旺年年中主交時即不堅若得吉星三合照中  
年破得末團圓○月孛生來少積貯假使中年承祖宗  
付托有如三春之花正開時被狂風猛雨折了若有吉

星照視方免破敗○計求財如緣木求魚隨得隨喪多  
成多敗中末却主旺○水主初年耗散經云財帛宮中  
遇水星如人把火照霜冰第二宮中逢此宿初年囊橐  
盡皆傾水星生旺莫臨財進退難逃主有災縱有資財  
千萬倍如人把火照冰開別有吉星轉助則可若見水  
星獨臨陷沒必多破敗祖業

論兄弟宮

兄弟只論其和睦與不和睦今人多愛問幾兄弟若與

他分其數目則失矣茲見日月金木炁則兄弟慈和友  
愛日喜於陽位則福繁夜生在於陰宮則祿慢月主有  
兄弟姊妹上下和睦無尅害月在第三宮號為入廟經  
云第三宮中為閑極金主兄弟三人姊妹二人皆得力  
木主三兄二弟孝順和睦無尅只忌羅計孛火土必須  
尅剝當自立也羅主有兄弟三兩人亦得力主大貴計  
有兄弟不得力若獨行則兄友弟恭孛總不得力縱有  
亦爾東我西相見如水火與他人一般只宜自卓立水

難得兄弟力土不得力

論田宅宮

田宅亦為父母宮若見日月金水炁福星臨之得地必主滋蔭享上人之福經云多居產業金水木照田園○金主有祖業父母具慶衣食自豐○水難招祖業自立方旺○木多居產業父母全○月主尊親有壽宜居祖業忌羅計火土入宮分必須剋剥父母不然主過房庶出破敗祖業破而再成也○羅自宜卓立更有吉星照

臨則家道大興○計祖業難靠宜自卓立如炁木二星  
傍照不以此論○火不得祖業賦曰少失資財金火同  
臨獅子位獅子非午也蓋獅子乃官祿之位對照田宅  
在子位也若吉星則禍福又異○土雖紹祖業亦尅父  
母因田宅爭訟○亭主尅父母有祖業終破敗若居次  
胎則父母無碍更加土計同宮則主過房偏生經云田  
宅宮中土亭防三方閑極可悲傷此身若不為僧道却  
喚他人作父娘又云土星月亭居四鄉合招異姓作爺

娘不是偏生婢妾養東房移過喫西房

論男女宮

第五宮中號男女最忌亭計并火土必然尅剝少女男  
若非外姓應難主○若見金木水日月必主貴子俊麗  
之男○金長宜見女次則男貴主有三男二女或晝生  
人或在寅上名為愠怒無六巳人宜見異姓之子○木  
主少女多男日生則多夜生則次男聰明智慧女四德  
無全○水主有四子聰明端正至老得力如在戌位則



宜偏生過房桃花夾竹異姓之子若六壬人見之即主  
二男二女須詳吉凶星斷○日主五男二女至老不尅  
六壬人見之謂之尅星倍加福力○月主男得力若被  
羅計照破則主遲晚或長見女若在卯酉亥未巳者不  
怕惡星若見月亭必主尅剝經云子孫之位怕亭過無  
男應是女生多若得善星來照視晚招一對定應多○  
亭主女多男女遲見方保六丁人此宮見之全無縱有亦  
不得力如有吉星合照不妨若太陰相對則主男大貴

女封號日生則減力○火主二三人若為土星首尾合照或白日生人六丙生人全不得力主孤寡土主一子若入廟則有二子忌曜則減力○炁主有男女宜遲此星亦名孤星○計男女少若早見則定尅晚年主一子羅不宜早見經云蝕神臨子最難為得力還招外姓兒假饒若過三旬外親生一箇是便宜主桃花夾竹偏生過房惟六甲辛壬人主三男二女至老得力若六巳人此宮見之全無子息縱有不得力○又論命宮福星盛

旺必主子息之盛若見凶星惡弱必然蹇破經云妻無子息都緣月孛在七強凡論女人子息大槩與前同惟巳午宮坐命曰乾宮若見計孛忌星則主難子不生或亥子坐命曰濕宮若見金木土星多主子息三男二女之數

### 論奴僕宮

第六宮中號惡弱五星不得臨照著一切加臨在此宮福祿資財日消鑠凡星辰皆不喜此一宮若得善星在

其中福力慢主奴僕侍從之福金木得力定主少年尅  
父母○水主有奴僕鞍馬中年走失○土有奴僕多走  
失若有木星同位則至老奴婢成羣○羅主奴婢自然  
豐厚一呼百諾○日一生得力若見計孛火土刑星反  
遭其害○計常被脫賺○孛不得力多走失○火有奴  
僕不久遠六甲人見此星者所謂祿主臨惡弱之地難  
為享福若魁星科甲三方高強無慮此宮若科甲魁星  
官星學堂祿主一切星落此總不得力

論妻妾宮

妻妾一宮與命宮相對又曰西沒宮看此宮有何星曜  
若見金木水星則主美貌夫婦和睦若見火星計孛必  
然尅破陷害又況金為人之妻星看金星落何宮又看  
善惡星相會言之若會木水必近妻家財妻之陰潤或  
近陰人財若同火土計孛必多尅剝經云尅妻害子太  
乙與首尾同宮

論疾厄宮

第八宮中號疾厄忌見計字并火土忽然陷沒更疊刑  
難免疾厄終身禍如有福星來解免尚且疾中難可保  
若無救療決生違至死必須還尅破君子貴命見之多  
主脚疾股肱之患終身常帶氣血之疾小人則折脚眇  
目拳禿駝腰官刑徒杖之禍女人多招產難血氣之疾  
至重者亦至身疾金計相會男女多主雕青痕痣也

論遷移宮

遷移主行藏喜金木炁福星臨之主君子遷官進爵經

云欲問榮華大抵金居九位凡見善星臨之處世行藏  
皆吉若見凶刑忌星主平生多歇滅縱有官品常多蹇  
滯若見忌土多主九流商旅游學紫炁土星並係客星  
此論載靈臺經

### 論官祿宮

第十宮中號官祿若見善星多富足貴人職品必須高  
小人必近食官祿凡貴命又看宮主是在何宮却分品  
序此宮若見凶刑忌星計字陷弱反成不足職卑命薄

也

論福德宮

十一宮中號福德若見吉星須享福加與金木紫炁同  
更在強宮必為淑○若見計亭火土必多蹇破亦多主  
福中之憂祿中不足縱使富豪常有意外之不足○太  
陽福德最為奇白日生人喜得之五福俱全尊上德貴  
榮三爵福無涯

專論福祿二主



人元當生之年稟賦者十有一星安排者十有二局十  
二宮中所要者惟福祿為主十二局中所重者惟福祿  
二宮今推之五星質之人為凡有卓立功名致富貴者  
而此二宮未嘗無吉曜而福祿二主星亦未嘗陷○或  
祿主歸窠或福星歸福或帶吉而逢生或歸德而帶權  
或入廟旺似此之類往往皆是宜福祿無星而可耶○  
如其處世孤貧為人流蕩以其福祿二宮驗之未嘗有  
一吉曜而二星亦未嘗不弱或祿主背命或福曜逢

囚或祿宮帶刑星而黨立或福德帶惡曜而傷殘似此之類往往皆是豈五星關鍵而不在此二宮耶

再論福德宮變格

福德一宮人莫窮晝生從日夜從陰數取日月相去位還從東出配其終數盡之處為相位次看何宿守其中若遇善星相對照福壽高崇祿料豐又無金木作宮主福德高强福更隆

見西天都例經

福德者為身命之根源吉星聚此則福壽堅牢惡曜臨之則命浮弱吉凶如響凡推其福德宮日生則從

太陽數至太陰夜生則從太陰數至太陽數其相去幾宮然後從命宮數其相去宮位即為相貌次則福德若正坐高強復得吉星為本宮之主加以文星又在高強必然享福無窮受祿綿遠

### 再論相貌奴僕兩位

相貌奴僕非高位兩者多緣凶與忌當生七曜落其間一世孤窮苦憔悴晝裏生人火占高月最不宜來對視夜逢土宿同此推太薄如何望身貴月在惡曜行度間惡者復強善者閑三方不救五星伏必為賤隸處人寰

論相貌奴僕於理為長識者宜詳味之

定三日宮

若下胎元宮不下三日宮  
若下三日宮不下胎元宮

三主高強福祿昌文星會命貴人鄉更逢紫水臨其限  
少年及第佐朝廊○三日宮中紫孛羅三方辰戌更相  
過若被忌星來照著定向三朝損命多○三日宮中居  
惡弱更加凶曜在其中吉星不照難延命縱然不死患  
重重○三日宮中土孛傍三方間極可悲傷此身若不  
遭此否定教他人作父娘○三日宮中水木星平生聰  
俊佐王廷三方若在高強位金榜無疑定有名○三方

始得力羅紫命中行縱然為文職須當帶珮行○一生  
身命處高宮三方精徹在其中官祿遷移吉星照貴郎  
給諫至三公○三日宮中晝火星夜生遇土一般同紫  
炁限星如交著定見危亡三歲中○火星有壽只三年  
縱得成人被禍纏大限不到三四十須交十五入黃泉  
更看生後三日宮月到何星分度中金木相逢俱是吉  
若交見水性偏聰○善星更作身命主復占強方不失  
度此為有福無難人一生謀運何嘗阻忽然至此却逢

火終身宜免興災禍第一損壽二損財所何多垂遭折挫更坐土星同照地常時分外生逆否木曜縱橫不救之祿筭永終天然矣

夫三日一宮最難分別或者以為身命第三宮或者又為日第三宮互相矛盾妄指其說以為奇吁論五星者尚不識三日宮何以論人之禍福夫三日宮者係人一身禍福之地惡星躔之災禍隨至吉曜臨之福壽可期如其又在十五度中其應立驗烏可不詳論之今以三日宮併言之大凡論三日宮先推太陰躔何星宿而後逆推其宮分前三日則前三星後三日則後三星也如太陰躔尾宿前三日尚屬斗宿後三日屬房宿此為三日宮甚明而禍福如影響捨是推何星而躔三日之宮乎從其輕重分割則造化

可窺  
矣

定胎元宮

太陰所歷  
過一宮是

余按此條有二明三暗之說蓋  
引天機所重者而証已之言

胎元宮裏金無木貧賤性殘當天促人生不幸定遭之  
若見時臨傷眼目○土火胎元係二明男子遭之則昌  
榮婦人逢之夫位顯莫教柔曜月前迎○金水二星號  
最柔蟾蜍無令與聚頭抱病打傷猶可已其間貧苦更  
憂愁○月過一宮為胎元金木相逢定天貧火土二交

并孛曜高強即是富華人天機數有胎元星三暗相扶  
及二明必取富豪并世祿其中一半是官人疾病多端  
見小孩只因金火犯元胎奈何上下相關照眼目瘡癩  
競發來身宮胎元紫炁星不是疾厄與孤刑尅害爺娘  
身自立不然有異見雙生男女紫炁犯胎星且為僧道  
及孤貧不是雙胎并異母又須刑害尅雙親後扶前引  
看星辰強曜康寧福壽人錯說陰柔凶短折更加惡弱  
老憂貧太陰却到會空辰金木從高性且迷恩及親知



成悔吝到頭顧遇有誰人月限犯孤星不救

月前方九十度無星

對月皆金木水行年又却值三災

月限忌土木二交行年不要見

後人推步知

相識若使斯人禍患來

太陰所歷過之一宮謂之胎元宮以未生三日之前月在其中故也亦名生前三日宮此宮有星曜禍福尤切月在此之宮謂之身宮未到之宮謂之生後三日宮此三宮星曜照見善惡與身一例言之天機無生前三日生後三日之說只以前扶後引有何星曜依訣斷之則無不驗然只以去太陰二十七度為準在二十七度外雖是隔宮亦如不見不謂扶引也天機更取前一方者蓋以十二宮分之為四方則一方者月前三宮是也定九十一度為準九十一度外不是如無強星輔之月限孤矣

總龜十二位論

命宮

欄駕經天柱星飛在祿宮又玉堂貴人宮卯上謂之明堂午上謂之軒轅戌上謂之武庫身命主星居此未可作下流命看天柱而羅計同不吉獨行主人身閑若在天門及飛天宮上吉大凡祿主居廟旺之地皆主發祿財主星會天柱在弱宮吉天柱命主二星俱入金門宮不必論田宅最好文昌星入學堂主修學如丁巳生人

天柱在未名夜劍鋒煞未為陽刃主天壽凡人天柱帶馬獨行見太陽主人心狂天柱躔遷移宮主人入贅過房遷居離祖之類與天蠱星同主人好訟或天蠱入身命宮主多招訟事天柱入官祿之宮乃官祿入命主星尋官並以吉斷

歌曰金星入命夜生吉 白日生人減半力

木星照命有多般 白日逢之必作官

夜生若有暗曜雜 返為凶禍主憂煎

水星在命合入廟 夜裏生人太陰照  
或居雙女與陰陽 決定少年居顯要  
火星入命不堪詳 白日生人主禍殃  
更被孛羅三合照 定知啞吃與人傷  
患勞枉死人孤寡 夜生又宜却無妨  
土星入命主頑鈍 夜裏生人不可論  
水命定知須啞吃 黃腫氣疾命難存  
太陽坐命若逢木 羅紫同宮須食祿

火星不照定封侯 月孛臨之患心腹

太陰在命生逢夜 水宿同宮為僕射

土宿入命孛星來 有祿定知非久謝

紫炁印星號天乙 凡在命宮皆有益

生時不被惡星臨 善宿合兮多子息

未月見紫入夜宮 夜裏生人為輔弼

若是土星三合照 雖則高强終是疾

羅喉入命計謀多 木紫同宮主富豪

金木太陽三合照 此人慷慨更英豪

女人夜生羅照著 自縊勞刑貧又薄

紫火水計入命時 此則定主十般惡

計都入命憂火命 此則十煞惡無定

貴人遇者以無權 白日生人宜修進

木星紫日如照臨 主命俱強為福慶

孛星入命人廉潔 目快心清為性別

紫木日金合照時 所作高強皆有節

日生火孛主星微 決定刑傷蛇虎食  
掩口不開氣衝人 直得為官須歇滅

### 財帛宮

欄駕經天寶星財帛者天寶所司看飛在何宮祿主玉  
堂吉見羅計孛火土正忌星反財物耗散怕廢星財不  
興耗星財不聚陷星及狼籍分皆不吉會天蠱星主訟  
破財

歌曰金臨財帛足隨時 夜裏生人皆進滋

木臨財帛必豐隆 日中生者最難逢

水臨財帛財帛散 更被孛來不足看

火居財帛與前同 土居財帛皆豐亨

太陽居此足錢財 貨庫常開待物來

月居財帛多財帛 只怕土星三合尅

紫入二宮亦忌之 遇日木扶還又得

羅計孛入損資財 終身不得資財力

兄弟宮



欄駕經天玉星所司兄弟之宮名為閑極如獨行飛入  
陷宮主少兄弟或本宮上見羅計孛多凶金木主二人  
水月主二人紫炁與水星皆善星日生人忌太陰夜忌  
太陽並為孤宿會刑廢耗主尅害狼籍主尅損見火孛  
兄弟如仇讎大抵男女二命可詳細推

歌曰木金兄弟主英雄 水星和樂旺門風

火在此宮定孤寡 夜生不與孤寡同

土臨兄弟終和睦 日居未可同年語

生時父母決相背 木計合宮主貧苦

太陰若得主星來 輔弼榮華由此胎

紫臨第三兄弟少 計星遇此斷生災

月孛來時損兄弟 古今傳說禍難推

田宅宮

欄駕經天富星田宅者天富所司在命宮主田宅加凶  
宿即無落陷終有亦少強宮廟旺承祖業如羅計孛星  
土忌刑廢耗星相會或被劍鋒狼籍天蠱對照或三合

傍照並主破產如飛陷宮主先無後有祿宮玉堂皆是  
自能卓立

歌曰金居田宅父母宮 白日生人主困窮  
如逢夜裏最為吉 產業自營邁祖宗  
木臨田宅興父母 自然福壽世難同  
水居第四旺田莊 更有雙親壽命長  
火星臨此不堪說 土星躔入有房廊  
白日生人為最吉 夜生父母早身亡

日居田宅足田園 木臨雙親壽命全  
火孛不照多產業 水金合會常堪憐  
月臨雖稱旺田地 白日生人反作累  
紫炁居之多壯宏 父母一時居富貴  
木星入位必有官 水月合兮居顯位  
羅入田宅不堪猜 十般惡死及破財  
計都侵之憂父母 田莊牛馬化成灰  
月孛居此亦如之 夜生亦可減毫釐

晝生又忌火來尅 父母早亡主孤恹

男女宮

欄駕經天孤星男女乃天孤所司大槩與兄弟同推詳  
入陷宮主遲或刑耗忌星化劍鋒狼籍天廢星並主尅  
損更看犯星輕重太陰在五宮先見女金水多男女羅  
計主拗性及尅害

歌曰金星若在男女宮 三男聰俊各英雄

火在此宮不得地 遇著定來更莫窮

土臨第五遲遲有夜生決定主孤蹤

太陽若照男女宮必主貴子顯門風

太陰居之亦如此三男富貴夜為功

紫炁當生照男女不被惡星并火土

三合水月同聰俊男女榮華定文武

羅照男女主天亡計都臨照亦災苦

孛星倘若照此官十生九死空費乳

為人性狠惡肚腸此乃依經與君語

# 奴僕宮

欄駕經僕馬星六宮見亭與人不和太陰星入此宮定主卑微下賤又惡星會極不好天柱星入此宮主閒事勞漉小人反覆不情之態

歌曰金木星居足奴僕 土若加之夜為毒

火在此宮必少力 太陰值此多悲哭

非惟辛苦有多般 決定生時非正屋

月若居之被日土 一世多逃更貧苦

第六宮中見太乙 男女頑愚多忌疾

不然遲忌亦寡微 此乃皆言為不吉

計羅居此有災殃 字若臨之號凶極

妻妾官

殿駕經天對星妻妾乃此星主之忌惡星在此宮主損妻天對之星入陷婚遲此星見劍鋒狼籍及主星皆不吉金為婦星須要明淨如同劍鋒煞主凶亡見羅計主尅害孛寅金申主妻有貌帶官星主妻有陰見刑星即



刑火主重婚土主重濁肥短貌不佳金水秀麗木星長  
瘦金星逢天耗狼籍二星女命全見主尅盡外家財帛  
人口之類

歌曰金在七宮妻妾好 木星會此日相逢  
其妻非但能廉潔 貌白容妍世孰同  
水在妻宮多妖冶 火則傷殘莫論容  
夜生猶自主離別 何況生逢在日中  
土入妻宮無貌娘 妻妾命如日裏霜

太陽美貌火孛醜

太陰見水美容粧

紫木星臨太陰吉

羅喉自縊檢尸傷

計入妻宮勞患死

不然毒藥溺江亡

妻妾宮中見孛星

計都水火自相刑

無主蛇傷並自吊

不然產難墮青冷

火孛瘟黃死暴哀

落水懸崖產難灾

金鎮太陽真絕妙

多招妻妾外家財

火土生離并帶疾

鼓盆三度請良媒

木紫二星多美麗 姿容可與孟姜偕

羅計二妻產難別 暴喪逃亡自帶來

紫孛水金淫慾甚 交情奴僕老心灰

### 疾厄宮

殿駕經煞難星疾厄者煞難所司如見本宮星主帶疾  
六八十二同見孛主破相或有宿疾此宮水月同主風  
疾土計同主脚患土孛同主耳聾火化劍鋒主心腹血  
氣之疾金忌火傷主血膿腸風之類大凡命宮疾厄是

火忌孛星照羅計穿命不問福祿皆主夭折火星大忌  
午上照身命及天柱星皆不吉

歌曰金在疾厄永無疾 木居富貴常安逸

水在此宮遇計孛 必定腰駝并背屈

白日生人火曜衝 必定風疾吐血終

熒度疾厄須驚悸 土臨八宮主瘟凶

太陽遇計火土孛 風癆血病不久歿

如見木陰獨照之 一世優游無消歇

此宮若見紫炁臨 定是安榮居要津  
羅照此宮應篤疾 計會亭來定凶侵  
非惟勞瘵又瘟黃 抑且吐血卧床亡

### 遷移宮

欄駕經遷移謂之近強人命三合宮見土宿主離鄉忌  
星主貧賤福貴祿星吉曜主經商如見月亭謂之客死  
星見羅計主偏生庶出過房出祖帶刑出祖不離鄉土  
若四刑星無紫炁星解救亦主過房出祖金木吉水宜

遠行金木合照封侯火入凶土阻遠行太陽主晝生吉  
月會金水夜生吉

歌曰此宮見紫主為官 太陰合兮為瑞端

羅在遊行必見刑 家中長見檢屍靈

計都若會孛星入 決定蛇傷并虎擒

切聞月孛入遷移 損田損宅損妻兒

官祿宮

欄駕經官祿強星乃司命掌之又為文解恩牒之星士

人遇之主發解僧道遇之主披剃庶人遇之主發財置業如下流命本宮見之會天蠱狼籍主犯刑法官災小人最怕陽刃官符宮主星相會及與的煞狼籍星會無福貴二曜救解凡與宅宮主星相會皆不甚好更看命主星明淨會羅計主凶死不然看有祿無祿大祿小祿大凡主星會羅計者主夭不然中年火索照身命宮皆不吉即賤人也索星在官祿主貧窮下賤刑憲初主貴未必不好限入官祿宮添羅計天蠱入限或在六八十二

歌曰太白金星入官祿 一世為官居要軸

天上之宮會水星 太陽合照作公卿

水居好樂合於月 官居顯位職非輕

火在十宮夜入廟 朝端定列仍年少

福德宮

欄駕經福壽星福德之宮福壽星所掌宜天權福財照  
此宮上吉如男女宮得木星紫金水善星照尤佳緣福德  
與男女宮相對吉星在廟旺之宮順行為福深在陷宮



為福淺最忌火星主傷福德故也

歌曰福德宮中或見金 夜生一世福神欽

木會太陽居十一 祿優福厚居顯秩

水會月吉火淺薄 金土同照主食邑

十一宮中羅最吉 太陽木炁三合值

生則須封萬戶侯 死則定知須廟食

### 相貌宮

欄駕經相貌當與六八此三宮用推詳李羅計會或主

刑害破相疾厄六根不足之命也

歌曰土星相貌却烏黃 木宿元來瘦且長

金白不惟多嗜慾 水星行動愛趨蹌

羅喉薄藝隨身有 月孛為人帶黑醜

熒火一星多性惡 水星最是雙眉好

計都巧計愛談論 羅火東西打殺人

水火相隨多雜藝 太陽為性却逡巡

月孛一生多口嘴 水星伶俐木都美

土星頑鈍言語澁 羅火為人貪可鄙

琴堂十二位論

論命宮

凡坐命宮官祿福德田財星飛入為吉此乃富人之命  
切忌空亡的破流霞劫煞不吉必主暗疾破相華蓋居  
此必主傳符度法之人六害星辰飛入一生勞碌

論財帛

凡財帛主度主官祿福德主居此一生富貴財星飛出

田宅官祿福德宮富弱宮陷地主貧賤更空亡的破居  
此再財星失陷則食不克口衣不蓋身若財帛高強根  
基厚重衣祿豐隆若六位星辰居此管幹起家之人也

### 論兄弟

凡田宅官福四星入此兄弟豪富空亡的破入此兄弟  
貧賤孤寡星居之則鴈行無伴官符居之主兄弟逞訟  
華蓋居之主兄弟道粧疾厄流霞刃星入則兄弟帶疾  
破相馬星入則兄弟東西咸池入則兄弟迷戀也

## 論田宅

凡官祿財星太陽入此祖業見承田地加進空亡的破入此則產業破蕩或胎星歲破通關則兄弟爭奪奴僕主人則僕幹莊田之徒或田星飛起官祿福德財帛之地則富財帛同田星飛起則重賣交易矣

## 論男女

凡空亡的破居此則男女貧賤孤寡六害華蓋入此則子女如石中求玉流霞刃星居此則男女帶疾若居女

位女必產亡咸池星入男女迷戀田財官福居之男女  
豪富遷移星居此男必過房女必重嫁然陽宮男多陰  
宮女多

論奴僕

流霞的刃劫居之主奴僕有疾長生帝旺則無災鬼宿  
居之則奴僕偷竊

論妻妾

七宮隨祿妻有粧奩因而致富家業興隆空亡的破居

之妻性不常若逢木星生旺不是為煞招妻俊雅死計  
居之妻醜頑拘孤寡星居之必孤

論疾厄

此宮乃八煞宮若火星入  
之無制主人一生多難

月到見煞母有疾日到見煞父有疾五位飛來男女疾  
三宮星來兄弟有疾七宮星來妻妾有疾流霞的刃煞  
難居之主帶疾不寧於厥身也

論遷移

本宮忌孛星居之  
主離祖遷轉無定

身命主居此必當離祖過房三位星居之兄弟離祖女

見桃花煞居此有合則不良不然必嫁遠夫并陽刃居之則離鄉別井

論官祿

身命二主并財福居之則祿位高強的破居此不吉三位星居之兄弟豪富


論福德

本宮田財身命四星居之主清閑享用有福之人也的劫飛來有福不能享流霞亦然



論相貌

此宮名弱宮身命官福田財不喜居之臨官帝旺金木  
水陽居此則狀貌青秀若劫的流霞居之主破相



星學大成卷六

欽定四庫全書

子部

星學大成卷七

詳校官監察御史<sub>臣</sub>邱庭澍

靈臺郎<sub>臣</sub>倪廷梅覆勘

總校官進士<sub>臣</sub>朱 鈐

校對官中書<sub>臣</sub>潘庭筠

謄錄監生<sub>臣</sub>王 官

欽定四庫全書

星學大成卷七

明 萬民英 撰

總論諸限

洞微百六限起例

洞微太限一百年零六箇月故曰百六

命宮十五貌宮十福德妻宮十一詳官祿十五最高位  
遷移止有八年粮疾厄七兮共六六財帛兄弟五年強

田宅子孫并奴僕四年之半定毫芒假令晝生火在巳  
午未申酉併空亡二十六七為盡處不然破敗卒他鄉  
假令卯上安命日生人火在巳為忌星二十六  
歲限數至此不行故午未申酉併為空亡也

木在午兮火在酉三旬之七福非常天蝎之前生在晝  
六旬之六定為殃

當生木星在官祿宮至三十七歲以後限入天中至  
此稱心卯為命宮前即酉也日生人限至此逢忌星  
故為禍殃

人生百六以為準學人細說莫能忘

## 命宮十五歲

命宮初排十五年看取生時善惡躔晝夜陰陽分兩曜  
值命須知短壽年更有羅計字星照不過七七入黃泉  
兩曜者火土也日生忌火夜生忌土如在命宮必壽  
短更遇惡星臨照見命身者不過七七至四十九日  
須死亡也  
故云七七

若只三合五年定對衝三歲見連遭

三合宮有惡星不過  
五歲對照不過三歲

更看星宿幾時入再侵元限定為寬

行年惡星入  
守舊位則凶

生值紫炁木星照自然長少災躔此限管年十五歲  
看取生時禍福元

相貌宮十歲

相貌十歲限須知看取生時善惡推若遇晝熒并夜土  
十六七上定須危若遇吉曜生時過一自六七喜歡歸  
更言亭計相臨照十年困苦似神迷初入宮中十六歲  
對衝八九喜兼悲

初入限一二年有應對  
照三四年方應灾福

三合十與十一數宜須逐位細詳推此限管會都一十  
通前二十五年期

福德宮十一歲

福德十一細推排二旬六歲限方來生時善宿躔於此  
二旬七八受恩回

金木紫炁羅喉水月入  
順旺合照此位大吉

若言忌曜當臨照定須催促入泉臺



生時忌曜日火夜土惡星  
同此二十八歲身亡也

若遇行年吉星照吉星退後必興災五七三方善星照

三旬一二笑顏開

三合有喜星至三  
十一二歲見喜也

若是惡曜同前述禍惡皆從生受來

官祿十五歲

官祿十五限高強生時善宿在何方紫木金羅來照此

三旬七上入朝堂

官祿宮住十五年三十七歲入五十  
一歲出若吉星守照主榮位進職也

生逢忌曜當臨位行年暗宿又來傷四七之年當惡死  
未交前限早身亡三合見逢六七歲對衝三十九恟惶  
如三合見凶星四十一二重  
灾若對照主三十九歲身亡

此限管行五十一宮中善惡細推詳吉曜生臨當喜夢  
惡星照處惡還當

### 遷移宮八歲

遷移八歲命合方但看生時善惡詳五旬二上交中限

吉星臨照足財糧

合方三合也五十二  
歲入五十九歲出

加官進職分明定在外須知利四方

主星有力乃紫木羅星守此主  
進職僧道加服庶人有財喜

若逢惡曜凶星守五旬六七定身亡

忌星計字照此主灾  
五十六歲主身亡也

對照防灾七八歲三方五十八九防

如對惡星五十六歲有灾如吉星守則  
喜慶三合惡星照五十八九有灾危也

疾厄七歲

疾厄七歲限須防但看生時善惡詳吉曜六旬添喜慶  
灾星照著有灾殃

六十交入六十六交出初入限  
逢吉星六十交限便受吉慶

蝕神首尾如狼虎利害計字大為殃忌宿若非是方主  
六旬有一定身亡對照六十三灾至三合六旬六限當

正逢限星六十一歲灾如對衝六  
十三凶如三合六十六主身亡

生逢惡曜灾應厚吉曜臨時百福昌

妻妾十一歲

西沒妻妾十一年六旬七歲到其邊生值惡星居此位  
六旬七八便憂煎尅妻害子加灾至為官罷職不堪言  
三合防灾七十一對照六十九來躔

惡星火土計字也六十七交入  
七十八交出吉則吉凶則凶

奴僕田宅男女共十三歲半

奴僕子孫與田宅此限共計十三年每位分明四載半  
都來半載一周天七旬八歲交前限生時星宿細推遷

八旬一歲歸男女八旬四上入田園五宮惡曜八十一

四位八旬六七言

男女宮凶星八十一主身亡  
田宅宮凶星八十六七身亡

善惡限看當生宿灾殃須算降生年

看當生星辰元守宮排凶吉逐  
限交入合遇吉凶一一如是

前限不逢凶惡曜兄弟五年財帛全

財帛兄弟  
各五年也

逐年行宮到此吉壽星高照亦安然限位都排一百六

仍須學者細推研若更有人彭祖壽又從命裏說根源

統論

大抵洞微所急者限主也洞微所貴者祿星也所重者諸曜順行也所發者廟宮也所畏者忌星也所好者吉神也所輔者行年也所助者三方也所惡者計孛在他宮也如是善星陷逆則福慢順行則福緊凶星陷逆則灾緊順行則灾慢如遇吉星順行即得本宮加數若遇惡星他宮則其數半減若是限星居廟度即於本數外

更加四年居旺樂度即增算二年如一限之中見兩星  
在旺樂合共延四年以此增損數更在子細加減凡逢  
惡限行年上却逢吉星臨照身命即延得一年壽其行  
年星過便亡也大凡吉星居七強為福緊五弱力慢灾  
星在強宮為灾慢五弱為灾緊凡限本宮見星灾福之  
應十分對照七分三合四分凡限星在終末之度即灾  
福之力側微而不可以定數言之凡忌星在好樂宮入  
限三年內為福三年以後反為灾咎大凡限逢忌星不



死亦灾若火在陰宮土在陽宮或為三方主雖有厄而不亡故歌曰夜忌土星日忌火三方不是死無疑此星若是三方主雖有灾侵命不離火陰土陽宮尤妙好樂位中别有奇謂此也凡灾忌星生時在伏段限內為灾禍只有三四分力福星生時在伏段亦只得三四分力蓋被太陽所伏光芒不見有類臣居君側包藏光美之象凡一限中見吉凶星同聚即以入宮先後及順逆而斷吉凶故限入宮深者先見限入宮淺者後逢之也凡

遇本限及對照三合並不見一星名曰空限主多灾凶  
圖事不成若得限主當生有力之位則反此惟有官祿  
宮上逢空限最凶必於四十六七歲死矣凡當生若吉  
星照身命者主中年富貴縱逢灾數直至限末始見灾  
厄若當生凶星照身命者中年雖逢福限四旬之後亦  
主遲滯至限末方為福大都吉凶之應全藉根基當生  
有祿則吉限上無祿則喜宮難發是猶無根之木雖逢  
春終不能發葩而成實也故經云若無一星居身命自

金匱要略卷七  
是賢愚別有因此之謂也

洞微歌

百六惟推星命人 有星方是富豪論

若無一星居身命 自是賢愚別有因

夜誕晝生忌自別 晝土夜火前經說

陽宮晝火陰夜土 此限逢之死可決

夜生人忌土晝生人忌火此是忌星各自別也若更晝火在陽宮夜土在陰宮限數遇之死無疑矣

福曜相兼榮裏亡 暫時延得少時節

若忌星限內却有福星照臨即此人在稱意中亡但是一時也

生時計字若同宮 逆還還是死前發

生時若計字同宮而限內逢者必先失官散財然後已身亦亡也

夜土晝火是主星 亦為災害亦為榮

夜土晝火非為主 災禍相仍難再生

日月金木并紫炁 當生限內成貴榮

以上七曜要當生得力度分不移旺廟宮掩映方為貴氣

羅喉亦是貴權星 限若逢之無不利

羅喉是天上貴曜別無  
凶星刑剋當領重權

當生字至為災異 家宅不寧禍有餘

限遇月字主老幼不寧陰私氣悶兼有哭聲夜生較  
輕惟到金牛胃宿九度巨蟹二十一度則反有遷榮

剝官退職因何事 限裏元來見計都

若在亥宮并戌位 反為遷轉涉亨衢

縱有吉星同限內 些小災患不能無

三空若遇災頗併 六年之內增重病

惟到獅子十五年 出限之時須喪命

中限災福有遲速 對時三四合五六

惟是正八最無疑 一二年中之禍福

好星限內惡星來 身命行年小可災

限星最忌逢惡曜 定行催促入泉臺

凡人逢忌星行年又有  
凶星照臨斷定不生

限星若在旺廟處 必見貴人有遭遇

廟星增算四五年 樂旺一二年為據

忌星若在廟旺宮 不為災害福相逢

星入宮淺官早來 星入宮深晚為職  
大凡五緯忌留逆 善惡逢之皆減力  
計都要在戌亥宮 命限之中不可逢  
星限之內一百六 說盡人間災與福  
好星增算惡星乖 限內分明一一排  
陰陽大抵須消息 必候聰明可斷裁

洞微歌二

前限惟推富貴人 不知更有苦併貧

若要得知從何起 但看生時與限辰  
太陽為父在高強 火字同之必早亡  
太陽兩處怕猪蛇 凶宿臨之少哭爺  
太陰為母同惡宿 不死之時禍又速  
火月相對如非主 方信無男亦無女  
金與字計入陰陽 不見妻身姪亂戕  
多姊多妹多兄弟 只看命前第三位  
命前三位有惡星 兄弟多傷亦無義



限數如來到火上 晝誕夜生不為主

及與二星相對時 不配不溺遭蟲虎

生來何得早貧窮 二星同到兄弟宮

如有善星對合照 縱教有始也無終

字計到兄弟宮及火日在四宮雖有金木紫相衝合身命始貴終貧作盜賊也

尅妻喪婦從何得 二宿同來見太白

太白反與火宮同 陰陽身命須消息

凡妻星與水火同在陽宮主生離及性惡在陰宮主自縊暗死與字計對照主無亦主縊離

日月同宮夾火星 月宮人馬土星臨  
平生雖道無災福 久後須交眼不明  
出家移父在他鄉 不必星辰在廟堂  
但看生時與九宮 四星何處奠其方  
此歌雖是長如牘 子細推之有災福  
學者要得逢其真 看取行年限遲速  
百六吉凶歌

人生貴賤稟星推 限數交宮各有時

凡人貴賤皆稟日月五星之氣如以星限推之可見休咎限數者若卯宮十五辰宮十之數是也

若遇羅喉金木曜 太陽紫炁月宮隨

限逢此曜遷官職 火土星宮到便危

若人當生以上吉曜在高強得力度分限數遇之必合遷官喜慶如其星生時不得力雖逢之為福亦微薄此歌中略不言水星災福者蓋水無定性附善則善附惡則惡也

夜逢土星晝火曜 三方不是死無疑

此星若是三方主 好廟宮中別有奇

夜生人土不是主晝生人火不是主限數逢之立見災危若是方主雖有厄而不亡又如甲人逢火戌人

逢土惟此二命雖是忌曜亦於其限內  
遷官轉職將出此宮然後身亡故也

家宅不寧因字至 更兼逆悶恰如癡

月字多主家宅不寧心神不快陰私  
逆悶晝生尤甚惟六乙生人較輕也

計都失職終須記 若逢奎婁立轉移

計都臨限居官者失職常人散財疾病如更值日月  
其災轉深移到白羊宮奎婁二宿則反有遷榮稱意  
之喜

首曜陽宮為福緊 尾星陰位定災稀

羅睺好晝在陽宮則福力更加  
計都好夜在陰宮為災較可

宮中對視三方淨 空限凡營事不期

官祿上逢空限死 四旬六七命須悲

凡遇本限及對照三合並不見一曜名曰空限主多  
逆違圖事不成若得限主當生在有力之位則反此  
惟官祿宮上逢空限最  
凶必於四十六七身亡

善星限內逢災忌 稱意中亡是此基

只有災星宜詳審 剝官字計限仍知

更逢忌曜因何死 失職中亡請細推

若人行金木炁限晝火夜土與計字同宮即有祿者  
遷官而死無祿者進財而亡如星限中只有災星不

是忌曜即須子細消息定之蓋災星慢於忌曜故也  
字計限仍知失官散財憂撓疾病如更於忌曜同行  
此人必有災而後身亡

畫土夜火如是主 限逢稱意主官資

火陰土陽宮為妙 好廟宮中別有奇

主領重權王委任 延年四二細推之

畫土夜火如是主仍土在陽宮火陰宮則有加官進  
財之喜諸星入好樂廟限者合統清要之權為王腹  
心兼廟限者於本限別更延得  
四年在好樂限者延得二年

五星伏段臨宮位 災福三分與四齊

五緯居伏段與日月相近則災福之應有三四分蓋為太陽掩映光芒不見故也

吉曜七強為福緊 災星五弱有災疲

吉星在七強則福倍加災星在五弱宮則災較重也

臨宮一二對三四 三合年中五六推

凡限在本宮者發在第一二年中對照限者發在第三四年中災福之應十分三合見限者災福之應四分而發在五六年中也

限數臨宮未一歲 身命行來災忌隨

前宮更有忌星迫 未交前限命須悲

大凡行限到將來之時身命行來宮上見災忌之星前一宮又遇忌星來迫則更不候入前宮而便亡假令夜生白羊是命生時土在人馬自三十七至五十一限在磨蝎於五十歲又遇土星臨照身命則便不候交人馬限而亡也

身命行年逢吉曜 不候交宮福佑之

如人將入福星限未交限前一年遇金木紫炁羅喉照身命行年宮則不候交到前限便有遷官喜慶之事

災星忌曜命宮位 樂宮二位莫生疑

一二歲中為福慶 已後災侵禍不遲



若晝生人火在天蠋夜生人土在磨蠋寶瓶數遇之初入限一二年主有喜事已後必有災危

又看疾厄遷移宮 更詳諸曜命宮推

孛計相逢無吉曜 限數將交定死期

妻妾疾厄遷移名曰三緊位當生切忌惡曜照臨若見計孛則壽夭而不善終行限至此又無吉星照臨則出宮時死矣

限中紫炁星相見 職位清高主翰詞

十一曜中惟推天乙紫炁遇之倍勝別星若當生更與日月同對此限數遇之未仕者主釋褐授官已得仕者職加清峻名位顯揚或居臺閣

一限兩宮俱好樂 益壽四年福要知

假令獅子為命宮行金牛宮限遇見金月二星是官  
祿宮中好樂又火土同在磨蝎火臨旺度土臨廟堂  
是兩宮好樂限數遇之不問晝夜在限本數只加  
一星之數經云晝火不增數夜土不加年故也

限逢惡曜兩相見 為災至甚定難移

一限之中見兩災星臨照則  
災重雖遇善曜亦不能救

初入忌星宮限裏 身命行年惡曜隨

留逆之月為亡月 宮居五弱不須疑

如人正入晝火夜土限身命行年宮入值凶星守照  
兼其宮在五弱位雖是初入限忌星留逆之月身便

亡更不候依常  
數而災發也

限惡行年身命惡 好曜過時也便危

凡人限在火字計宮上時下若遇福  
曜臨身命行年吉曜方過主見災也

星辰本宮勝餘位 七強宮內福加之

五弱添災福祿減 學者須詳善惡推

七曜若在當年本宮度分更若高強限數遇  
之勝於他宮若遇五弱則災重而福輕矣

死生災福無一失 方信從來學洞微

論百六數有增減

諸星滿用記前篇躋探幽玄是會元百六限中得本數  
更求增減又玄玄

星躔廟樂益四年廟好之宮加二算星躔廟旺增一年  
星在怒宮減一半

星辰遲伏且平行限到其宮不減增減於本限除一半  
增於前限外加添

獨論五星增減數六曜吉星只平度怒逆星辰同一宮  
內減外增無差悞

金匱要略卷之七  
凶星滿用平平過忌星廟樂不增加的取天機經百六  
興衰生死的無差

論限有出入半限定吉凶

何知根本理休為出入宮中有細微增減後來交本限  
惟將星曜細尋推滿用諸星主限宮須知滿用福盈豐  
設使縱橫星曜怒保全天命不殂終凶星在限本傾危  
滿用縱橫則庶幾只怕前宮忌星迫未交滿限命須悲  
凶星初入本為災若是中分福不來或有災星期限滿

於茲果斷最難猜有星滿用限須滿災星來侵限之半  
喜星救援入限宮依此推詳為妙斷火星入限便為災  
土計與災限滿來計火土羅喜救援例推主事識凶衰  
日月羅計怕相逢限遇交時命即終羅計若然逢日月  
如喜滿用即無凶忌星會限則當亡滿用之時福反昌  
羅計字星如守限無星催促且無妨日火會水不為憂  
月土得火反為休不逢滿用逢水火定行體骨揜荒丘  
紫炁福時前限福橈搶後來方災促若是滿用福祥多

仍識縱橫須委曲限宮凶吉星共同增減滿用不滿用  
星辰主事分先後用事先權福為重星辰滿用吉凶同  
亦尋星入理先蹤吉星先入先為福惡曜後來後亦凶  
救限最吉祿主星更兼食邑與科名文曜三方并壽宿  
限宮當主亦延生大凡滿用皆榮美能伐凶星尤可貴  
被伐名為受制星相喜往來皆慶瑞滿用相喜來百六  
入仕遷官榮爵祿例推出入與中分育子取妻發金穀  
紀綱百六辨凶衰測驗天機緊洞微更有細微陽九限

逐年災禍細尋推

論限星切驗都例

單星守限不滿用仍算行年星入用若臨善曜福無涯  
惡曜交加歸大夢更知生死憑何據百年六月分三處  
二分為生一分亡生限可逃亡則住生限凶星尚可逃  
三之二分總星交六十七後為亡限凶曜當之命即拋  
百六交宮取定期直須生月日兼時交宮過後方為准  
逐限推求深斷之交過前宮入限中除却前限萬端凶



如囚圜圖遭原赦魚出疎罟鳥出籠吉星臨限多發福  
入仕遷官榮爵祿誰知此歲濟歡榮更加日月蒙星福  
又知百六合凶星救援全無大可驚須知其年當棄世  
知何日月往泉扃百六限中當何月陽九宮中尋甚日  
例使縱橫理吉凶仍識月分前後節陽星須識屬前節  
日木水土紫羅別陰星須知後節期月金火星并計字  
又知星曜孰重輕陰陽兩辰皆會合須明禍福發何星  
主事後先期晦朔若識死時夜與晝限內星辰宜審究

陽星興禍夜間亡陰宿推殘亡必晝

陽九限逐年吉凶

人生災宿稟符陰 陽九相逢即此尋  
求法命宮坐一歲 二年財帛逐年臨  
只待平期二十五 移入限中逐例使  
逐年吉凶識星辰 直至限中方始阻  
百六限中守吉星 符陰吉曜福祥興  
官榮超擢移宸陛 仕庶凡謀必稱情

論洞微行年小限

要識星行禍福時須在流年位上推起於東出常為例  
一宮一歲逆移之交來每遇生日後不問陰陽總若斯  
流年小限立例始於命宮順天輪而  
轉次至財帛若在地盤則為逆矣

木照金臨皆有喜益財遷職多如意復到二星原守宮  
凡有所圖無不遂貴人更得一相逢舊祿既加新祿至  
納婦生兒吉慶門此時自是凶星避行年東出若同此  
榮進有期亦緣水更看所至主宮星如在高強自然利

假如限到午與未日月更為其主星日在長時福即深  
月遇初生吉無比日短月虧仍有災用茲可以推餘位  
行年如到火土處口舌資財悉堪慮若使其星復照之  
困厄須知少生路次第常推第八宮生時何曜在其中  
如值蝕神并土火遭刑遇溺卒然終或是火月來西沒  
及因上下禍多同

自一歲從命宮起逆行一年移一宮遇生日即交也  
不論男女皆同行所行之宮但只看其宮內有何星  
照臨而消息禍福大凡遇到火土計字原守宮即為  
災到木金紫炁原守宮必有遷官進財喜事若到宮

內並無星辰臨照即看其時有何行年星來到宮內  
木星入行年順行即通泰退逆喪服及口舌金星木  
星同入則君子加官常人財喜或在遷移則有遷轉  
出入之喜水月同入得女人財君子遷榮火入煩撓  
口舌土入三合有惡曜主刑禁火月同入主傷墜驚  
恐土月同入主冷病或痢疾火入行年在日宮則君  
子遷官常人男女得財稱心土與羅計入多重病連  
綿紫炁入在公遷進在私財物稱意更是原守則重  
重喜慶或進人口計都入在辰戌宮孝服官事字入  
行年多奸非及逆悶若更原守並無星臨視即看宮  
主善惡而  
斷吉凶

洞微飛限歌

洞微何要妙

要妙在飛宮

一二本限裏

三四對照衝

三合五六載

其年見吉凶

陽宮逆取順行去

陰宮順取逆行同

三合各一歲

本宮兩歲從

若能用此法

端的是飛宮

世之術者雖陽前陰後之飛宮所住年分不同不得其法故禍福難憑今得飛宮之法最為有理用之多驗學者却宜用此



洞微飛限詳說

一二命宮

三四妻妾

五男女

六遊行

七八命宮

九十妻妾

十一男女

十二遊行

十三四命宮

十五妻妾共十五年

十六七相貌

十八九奴僕 二十田宅

二十一疾厄

二十二三相貌 二十四五奴僕共十年

二十六七福德 二十八九男女 三十妻妾



三十一兄弟 三十三福德 三十四五男女

三十六妻妾共十一年 三十七八官祿

三十九四十田宅 四十一財帛 四十二奴僕

四十三四官祿 四十五六田宅 四十七財帛

四十八奴僕 四十九五十官祿 五十一田宅共十五年

五十二三遊行 五十四五兄弟 五十六男女

五十七命宮 五十八九遊行共八年

六十一疾厄 六十二三財帛 六十四田宅

六十五相貌 六十六疾厄共七年

六十七妻妾 六十九七十命宮 七十一福德

七十二兄弟 七十三四妻妾 七十五六命宮

七十七福德共十一年 七十八九奴僕

八十一相貌 八十二財帛半年共四年半

八十三四男女 八十五六福德共四年

八十七八田宅 八十九九十官祿 九十二疾厄半年共四年半

九十二三兄弟 九十四五遊行 九十六福德共五年

九十七八財帛 九十九一百疾厄共四年

右飛限以當生元守星辰看遇吉則吉遇凶則凶若  
流年又遇吉神無有不吉流年又遇凶神無有不凶

竹羅三限

竹羅乃山名在天之西北夜半子時諸星列宿皆聚其  
上判人間禍福李袁二士曾造彼處授書三卷分為三  
限經若限主得地則富貴終始如一

寅午戌宮 晝生日水土 夜生水日土

亥卯未宮 晝生金火月 夜生火金月

申子辰宮 晝生土水木 夜生水土木

巳酉丑宮 晝生金月火 夜生月金火

右三方主星取日出沒時分晝夜

說竹羅三限

安慶信齋有言愚於諸家星限無不窮究或言洞微限  
好竹羅限不好竹羅限好洞微不好禍福分兩歧更不  
敢斷細推竹羅限其理優長竹羅限有三不驗較量生

時不正一不驗也星辰過宮不正二不驗也交限不得其理三不驗也愚謂信齋之言最為切當然竹羅洞微兩家星限不可偏廢當兼而用之洞微大限只看本宮所守星及限主然求流年災福全在飛限兩限當以竹羅為先飛限次之若兩限俱好妙無以加或飛限好竹羅限不好識者自當權宜輕重其說可也

起限

太極肇分天地位二氣斡旋生萬類中有人為物最靈

均受五行之秀氣昔賢立法考陰陽日月推來理味長  
竹羅三限從茲得不識其原謬較量命中三限最難分  
時人將作主星輪不論陰陽宮宿度但從命裏起周旋  
若從命裏分晝夜十二宮中子細詳寅午戌兮日木土  
夜生木日土為強亥卯未兮金火月夜生火金月最光  
申子辰兮土水夜生水土木為良巳酉丑兮金月火  
夜生月金火相當此星名作三方主當從出沒細推詳  
三方最樂七強位切忌納音四煞藏金星四歲土星五

木三水一火二數

太陽元是火之精太陰便是水之副二法各取水火行便是竹羅三限路開端隔節數三宮逆行零順幾年終若見遠時數二節零年交入甚宮中但看當生星曜斷善星為福惡星凶零年順轉逐宮移遇交限處便交之中限便從本限起依前又數三宮止零年順轉逢末限末限又如前限起零年順數尋惡宮惡極之宮生即已一如土為初限在已上便從已上起五歲大數十五在

卯二十五丑二十六却回寅餘准此更要在七強順旺  
廟樂不宜五弱留逆經云三方陷弱其人空貴無官一  
主高強此命永成善慶





假令大紀二年戊子歲十二月初八日卯時生即丑  
上安命歌云巳酉丑兮金月火又云夜生中即反其  
初其人小寒節過十二日生可作夜生人起限月金  
火為例是年六十九歲火命人限星到寅即長生限  
也

三限用七政行年例

水星限二十四年 木星限三十年

土星限二十六年 金星限二十六年

火星限二十八年 日月取水火之數

已上行限各就其本位行其數若未交星即管數到  
第二星交是交宮行限須四煞宮方敢決人死生四  
煞乃本生年納音沐浴死墓絕宮是也

日限

日限土臨日不宜夜生交此多傾危日生尋取一周天  
每遇惡星難更延○日限火入計羅位或主傷殘或法  
終或若滿用即堅固深災過了却亨通日若為限要滿

用更臨旺樂明健宮貴者驟遷愚者福福中又恐催人  
促若得後限來救之却向中年多晚祿日限怕逢納音  
煞夜生更被羅計侵不惟家破兼無壽金火臨之主犯  
淫

月限

太陰行限土同宮忽然相望也為凶本原易散無根蒂  
此限纔交命即終假使交時須未死行宮逢煞命須窮  
愚者臨斯應天折清高之士吉還凶惟有太陰好水星

木金紫炁共同行更臨旺樂無刑尅月宮高折桂枝榮  
不惟福壽如山海輔助明君萬國寧

木限

木限當生遇火尅更被字臨全減福小人此限死無疑  
貴者交之須失祿更看後限不如前此限應不到周天  
木限若逢計與羅自然財散祿消磨忽然值限無星救  
憔悴危亡怎奈何木限官宮金主命榮貴崇高增福慶  
或被火字來衝破促壽敗官事不寧更有同宮木火憂

晉魯吳宮與鄭州相貌僕馬遭撲殺三九宮中謹遠遊  
凶星守照難歸舍縱然歸得命難留毒藥惡疾來相及  
限主元宮此是仇

### 火限

火若為限會於木此限之中即發祿貴者遷榮駭衆人  
小人遇此多財穀當生首尾不相交體大安寧兼壽足  
白羊三宮及卯丑其宮明淨十分福火限用金無雜亂  
金數加福乃榮遷後限若踰三四位火無長焰不能延

火若為限主離財夜裏生人尚有災或若日中憂壽促  
那堪尾曜來相觸自然破敗心多愚易盛易落時消福  
一箇周天子細推縱有深災命也危計都之次有羅睺  
忽然逢之主徒囚或更滿用占強宮後限強臨須福佑

土限

土若為限不宜逆死敗危亡須嘆息縱有吉星救不得  
斯人夭折心多惑或為夜限字星來此限交時的有災  
更有太陽相對望器小無情禍有媒不惟壽促兼無義

雖然內美外無財惟有土星好四處子午卯酉四宮排  
金限

金星行限火來侵斷定斯人至死淫更被字來同此會  
定傷筋骨復傷心偏惹是非迷酒色促壽亡家百禍臨  
首尾同之主滯多須交妻子不相和若在吉宮逢救宿  
縱有深災怎奈何忽然熒惑會於金私期暗約主奸淫  
有時刑法及傷殘只怕羅睺計字侵火金為限若相會  
限星滿用福為最或在死氣沐浴鄉淫慾為傷壽不長



更被當生暗曜侵刑法相殘百禍臨交限更交元氣中  
生時忌曜復來衝死見氣勞并吐血或主傷殘或法終  
慎者全無知者半智人能悟壽延從

水限

水若為限怕逢孛水厄氣勞并風卒四刑星照膿血終  
三九宮中失骸骨或居第八十二宮死敗加臨疾似風  
若得滿用居旺樂為官食祿爵彌豐

總限

限星明健命有氣安然享福無災否三限當生俱得力  
終身福厚無憂戚三限只得一限力一限所為多利益  
三限忽若兩限強只得兩限福榮昌交入當生無力限  
去者福兮來者殃初限若居無力地年年常是見述否  
中限不力憂夭亡自然財散亡家計初中兩限俱低弱  
作事難成福銷鑠若能知命學脩行末限微福便安樂  
生時三限俱無力定是終身無子息若非僧道作閑人  
一世孤貧怎過得

限星怕忌曜又忌在沉沒宮卯為沉酉為沒又忌在無氣死敗宮主多災家破人亡帶疾夭折孤貧餓死三九宮主旅亡在六十二宮主撲傷三八宮患手足疾即延年也九宮好閑遊逢暗曜則偷盜奸淫十宮火星犯徒金星奸淫計都法死孛星決配智者做此妙在變通不多言矣

三限各居明健方頓然發祿異尋常更得四元星助限穀粟錢財金富藏限強更得吉星照立事成功服萬方後限更高無戰尅封公公上又封王限星得力要垣星有限無垣亦何憑定取限星明健處垣星入限始為精三限四元時命併臨官有氣壽康寧不惟易發登榮貴

更逢合格主長生日月若逢吉曜臨明朝執政伏民心  
後限忌星臨破却自是官高被謗深人命三元與限同  
須看有氣占強宮身命三元無煞曜星辰縱陷祿重重

又

上貴之人看第十多是太陰并限入木星金水一箇臨  
限主傍宮躡科級若得限星無雜亂須為當代秉鈞衡  
水土星高主性靈或然作限更為清水交日月足文學  
自然才譽振英聲文官須得限星強木金水月臨照傍

限轉行年相會處科名遷職總相當後限不明宜換武  
免教失祿及恓惶貶官罷職以何憑看取生時正限星  
若犯忌星并忌宿行年到此自災生最凶李火如臨限  
早年遁去保前程

凡人三限惡星臨此限纔交禍便侵更被四刑星守限  
沐浴星宮子細尋更有十二六八宮行年到此見閻公  
忌限本處有些力更加吉宿庶無凶忌限當生占七強  
雖見深災未必亡行年復到惡星度魄散魂揚似醉鄉

限惡宮中逢火羅不惟促壽更奔波又犯四刑星守照  
王法須遭暗折磨子午卯酉最為弱壽福家財自消爍  
若遇行年相對時莫教忌曜微照著任是吉星災轉加  
本宮旺日死無差此限若為三四用終於原守莫咨嗟  
限若無力空性靈官祿宮逢暗曜星浮沈之人雖得力  
事公堦下度平生死氣二宮兼沐浴須知心下不分明  
不然遊藝或僧道若不浮蕩有虛名水火限來沐浴宮  
火胎在子事還同忽然作限終身福莫比諸星例說凶

限星陷逆本多凶若然不死大貧窮惡限破家刑骨肉  
不死必然末限通

初中限當死而不死亦主家破生災失財若是末限  
好必超出初中交末主方吉也凡限星在三六八九  
十二宮為陷對太  
陽為逆多凶害也

限居二八惡星躔須教脚手見孿拳十二八宮限火金  
太陽同守忌星臨定須帶疾并傷目不然廢疾或傷心  
火孛同宮并守限只怕刑星四餘侵若不雙盲定主夭  
衣食生來却稱心大抵凶星臨限時不惟自折更傷兒

忌星行限福星救却增壽算滅災危夫人三限忌星刑  
只恐斯人性自靈頑惡痴愚隨限沒智明精妙却延齡  
人生若得限星強一生康寧命也長若見多災偏聚散  
直推三限細推詳學者精窮自然悟星辰之祖此中藏  
限星怕忌曜又怕在沈沒宮卯為沈酉為沒又忌在  
無氣宮及死敗宮若在三九宮主旅亡在六十二宮  
主撲傷在三八宮主忌失足之疾即延年限星若圓  
淨明健又在七強宮則主富貴雙全壽數綿延也

### 貴人改動

重臣出入要先知三九宮中子細推行年限入終當動



凶吉星臨善惡移明健入垣為本限如臨吉宿發無疑  
限惡星臨如會此停官失祿禍須知

貴格行年

上貴之人限星全先要仁元與壽元得入正限及身命  
貴祿二星又相連或居四正高強位更無忌曜可修仙  
若不修仙須弼輔兵武星高主立邊或被忌星臨照破  
也為給諫主文權武星高者有將才文星為限主儒魁  
日月分明金水會片心忠節應三台

金為兵火為武  
木為文土為主

### 賤格行年

忌星忌曜同行限纔交此限多魔難更犯死氣并沐浴  
六親刑害資財散或時所守沈沒宮自刑自害多凶卒  
更向三宮與九宮客死他鄉無骸骨六宮十二傷肢節  
高險須防驚墜失此宮星曜不提防心愚祇是便無良  
陰陽二曜全無救終身貧窘走他鄉有福聾盲并吃啞  
手脚攣拳却免傷少年忿欲行奸盜老為餓莩及孤孀

倘若無疾為傷斲促壽亡身上法場

行年災福

行年限裏惡星來悲憂如醉沒心懷二惡星臨災兩犯  
三惡星臨重有災若臨財帛資財失交於人命多災疾  
第三宮中損鴈行第四父母訟災厄忌星忌曜會行年  
浮泛凶星小不寧若是當生原守惡不惟破敗更亡身  
三限行年到何宮分凶星主災二凶二度三凶三度  
若當生限明健行年逢凶則災半矣行年入二宮損  
財三宮損兄弟四宮父母災或爭訟八宮疾病九宮  
遠行失財官非訟厄五七十一宮防妻子災十二六

宮主危險四煞宮主災當生限好逢此惡星謂之浮  
沈凶星小小災疾忌星者日火夜土忌曜者木忌火  
字金見火字災淺火忌水字計羅水忌字土  
忌字及逆太陽忌羅計土字月忌火字土

### 論遊年星辰入命限

遊年星入限宮來或則為祥或則災本限吉星當日月  
如遭羅計大為乖遊年莫犯忌限中又論當生本命宮  
入命對宮尤緊限星辰凶吉最多功紫羅金木福榮昌  
字計火土禍兼殃八位尊星行度數行年入限定災詳  
忌星羅計與字星單守百六保全生遊年重疊臨命限

或加金位命當傾欲識遊年理凶吉算星交入命限別  
或是入到原守宮入宮之日星方說遊年亦論滿用星  
來家命限福祥興但算臨宮住幾日凶星滿用反康寧  
論童限

一命二財三疾厄 四妻五福順行流  
六歲却從官祿起 看看移到命宮休  
急脚限例

子起亥 丑起寅 寅起巳 卯起申 辰起卯

巳起午 午起酉 未起子 申起戌 酉起未

戌起丑 亥起辰

寶瓶在亥丑居寅人馬來蛇蝎奔申天秤在卯雙女午  
獅子金牛蟹寶瓶陰陽戌地金牛未白羊居丑亥居辰  
但向命宮尋起處一年一位掌中輪不論男女皆順數  
行年逢煞命難存子午即是黃泉路卯酉呼為二八門  
限到煞宮人便死若無惡曜主災迤

假如子上安命即亥上起一歲酉上一十一未上二  
十一零年順數節節而去即不隔宮如算小兒體例

一般最怕與限星併大小運併在  
子午卯酉宮及本命墓煞三刑宮

### 論黃泉急脚限

黃泉急脚衆皆知兩樣推尋識者稀急則順行還逆轉  
若能曉此是真機

世人皆以黃泉急脚為一限不知分為二蓋順行  
則為急脚逆行則為黃泉若能曉此是真機也

### 論斗底急脚限

孟二仲八季加五但向命宮相對取一則呼為急脚限  
二名黃泉檢死簿死絕之宮逢限凶大忌運限入四墓

忽然大小運相逢即時趕入黃泉路

如大小二運入墓者極怕此限男忌辰戌女忌丑未  
凶此限專忌入墓運順限逆運逆限順如命宮納音  
及太歲入墓鄉極  
凶更忌三丘五墓

大算須知倒限年海風吹動釣魚船火羅亭土皆臨限  
此地催人下九泉

倒限之法自古為信然但以諸星推  
求如諸限皆為惡星相照死無疑也

### 論倒限

論當生之限主星限宮星及小限次及行年星數四殺



三合推之若皆凶星照臨可定其危矣若有吉曜救助亦當分其輕重而詳辯之

西天聿斯經

人命生來稟星算歷數幽玄妙難斷須識西天都例經  
理義分明有條貫但問生時日宿宮加向時辰廻視東  
天輪轉出地輪上卯上分明是命宮因之以配十二位  
十二位中有高貴卯并巳午最高強子酉之方次強位  
寅申頭上名近強未亥微看三合方此方照處有不照

七曜皆同貴此鄉辰戌二宮名惡弱星辰不欲照臨著一切加臨落此宮資財福祿盡消滅第三宮中號閑極五星不得纖毫力惟有月向此宮生却向命宮添福德七曜陰陽各三主強弱輪排依此數白日生人見配之夜則歸宮求類取陰主三方月火金便為陰曜福其陰陽主三方日木土白日生人貴為主夜生白日背陰陽福祿不堅難積聚西天之法重三方生時貴欲在高三方若得居高位居宿之中各福貴忽然七曜並相當

超騰必作人中瑞金木二星為善星所為非主亦為榮  
火土二星為惡曜三方切怕他臨照夜生陰宮主光明  
晝則陽宮最為妙夜忌土星晝忌火各自相逢斷為禍  
火在陰宮土在陽縱有災殃還較可獨有水星本無定  
見附近處即為性附陽即陽之相輔附陰即陰為害病  
與日合照主榮貴巧妙聰明難比並木為文兮火為武  
金為兵兮土為主五星見月即非常三主居高必台輔  
諸曜皆言在強位更要七星乘旺氣日旺白羊十九度

月旺金牛第三位土旺秤宮二十一火旺磨蝎四與七  
雙女辰星二五中金占魚宮旺在室星七度與柳十三  
太白流之實可堪木向蟹宮初入鬼旺氣相成主崇位  
各於旺處逢一星出入旌旄主權貴更加所好轉為精  
木樂尾兮土寶瓶金愛牛宮火重蝎水居雙女最為靈  
生時一宿皆臨照即為豪貴處王庭五星見月三方主  
要得居高生旺處陽生向日陰生月將相三公必無慮  
又看生後三日宮月到何星分度中金木相逢主文學

聰明必見水星遇更遇善星作宮主宮主復來在強宮  
此為有福無難人一生所為稍皆遂忽然三日月逢火  
推命之中最為禍第一損壽二損財迤厄顛危常折挫  
更遇土星相合地終身坎坷多迤否木曜縱橫不照之  
壽終不得天然矣相貌福德宮又別畫生從日夜從月  
所取日月相去宮還從東上配其宮所終之處為相貌  
即看何曜在其中若遇善星更月照福壽堅牢添祿料  
又兼金木作宮辰復在high強最為妙其次又看相合地

土木金兮同一位忽居強處照其人的作公侯得榮貴  
若逢土木水合照性直文章主巧妙忽作熒惑反相刑  
即向命宮作凶兆土木同行生在晝更向陽宮富貴有  
夜生若向陽位中變作逆運作凶咎土金合照福堅牢  
性潔難婚亦貴豪金火合與照強位華鮮衣服志居高  
火土合兮有學祿智慧多端好反覆木火同宮主貴權  
為事心中多敏速木星合得好資財容貌端嚴志多惑  
月合木兮自遷榮月加即好減差平火合日兮生在夜

日在火兮必權霸木星照曜定封侯却向武中稱善價  
火星合照最超殊貴顯堂堂出衆徒火合月兮生在夜  
縱然殘滅亦分符木照更能添福德豐厚多財貴宗族  
月火照兮每倍加常患瘡病在其足同宮一處見土木  
火不照兮足財穀忽然兼居土木宮主握兵符多侍僕  
木金祿厚有慈貴名高美貌足財穀水日同宮或左右  
必豐學問足文辭水木同位又同行高才博學任公卿  
月木同宮位清列又在日前更殊絕生時值火伏同宮

先代家財盡消滅福星多處必財豐惡曜還生貧賤中  
第六位分對十二兩宮就分各凶忌生時七曜居此宮  
一世貧窮苦憔悴白日生人火占高與日復來相對視  
夜生土曜亦如然短壽孤窮登望位月落惡星分度間  
惡星高處善星閑三方不照五星伏必為賤隸處人寰  
更有五星相對視就中五星為災瘴相對在強并在月  
中年困苦多消竭濕宮水照投江湖乾位蟲狼多咬啮  
少男少女少資財多疾多逆多口舌或遭毒藥兼臨刑



了了經中皆具說曜經宮中陽為土復在陰中更辛苦  
火金相對不宜婚金月相照却宜婦鎮星對望詞蹇澁  
為事尋常濫心腹火月促壽及風狂火月自傷仍尅父  
水月猶自厄言辭土月對宮不宜母火星同月轉就土  
土星照月轉就火火月同宮皆深禍不然同在十宮生  
或守月行西沒墜此為夭折貧賤人又更防災家破敗  
星運要知災福時却向行年宮上推

行年初起從東起還將一歲一宮移每歲皆須就日生

數至今年宮上推木照金臨皆有喜加官益職定無疑  
更到金木原守處木金又照復何慮必得相逢見貴人  
舊祿重加福自新娶婦孕子貴門庭運縮盈虛皆有據  
行年東出亦同占水加原守喜同兼身命二宮皆要木  
金星同照喜加添更須促取行年至善星高位福同住  
但行獅子蟹宮位日月便為宮主是日貴長時福即多  
月到初生喜來至月虧日短為厄時須向心中明作計  
土火生時原守宮行年命運到其中口舌資財須詳忌

不然憂怕事關心如今火土又來臨厄難慮忌不相容  
末後相看第八位生時何曜守其中若遇曜神并土火  
多為法溺促其終更益火月來西沒或居上下禍皆同  
生時不欲星辰弱善惡之中皆減力退留伏守不如行  
對合宮中皆好亟十五度中皆正照過此還同不相識  
近轉得好福堅牢推命之人貯心頭五星照守近南方  
少年得祿恐非常好曜初星皆西沒早年祿後與倉卒  
惟是火星莫照西即知不得終簪笏生時土火在西方

所招凶禍難儔匹更有加臨虛沒位須多理曉其中意  
人生禍福皆前定分數無逃於天地但知子細認其歌  
更盡經中玄妙義

起竹羅三限

假如日生人寅上坐命寅午戌兮日木土午為日方  
亥為木方丑為土方此即三方主謂之三限便從午  
上起二歲管十年太陽從火論火數二逆數亦二故  
十二在辰二十二在寅零年二十三回卯順數二十


四在辰二十五在巳二十六在午二十七在未二十八在申二十九在酉共二十八年三十及三十一三十二停住三十三交木限在亥管十年木三數四十三在申五十三在巳各十年木無零數六十三六十四停住六十五交土限在丑管十年七十五在申十年逆數五八十五在卯零年順數八十六在辰八十七在巳八十八在午八十九在未九十在申共二十年通前是三限一周餘倣此推

太陽火星限二起逆數亦二各二十八年

太陰水星限一起逆數亦一各二十四年

木限三起逆數三無零 金限四起逆數亦四

土限五起逆數五 金土二限各二十六年



星學大成卷七